

禮儀典第一百四十卷

祀典總部彙考四

秦

二世元年下詔增始皇寢廟犧牲及山川百祀之禮 按史記始皇本紀云云

漢

高祖二年令祀天地四方上帝及山川諸神 按漢書高祖本紀二年六月令祠官祀天地四方上帝山川以時祠之 按郊祀志二年詔曰吾甚重祠而敬祭今上帝之祭及山川諸神當祠者各以其時禮祠之如故

文帝十四年詔增諸祀壇場圭幣令祠官致敬毋有所祈 按漢書文帝本紀十四年春詔曰朕獲執犧牲珪幣以事上帝宗廟十四年於今歷日彌長以不敏不明而久撫臨天下朕甚自愧其廣增諸祀壇場珪幣昔先王遠施不求其報望祀不祈其福右賢左戚先民後己至明之極也今吾聞祠官祝釐皆歸福於朕躬不爲百姓朕甚愧之夫以朕不德而專鄉獨美其福百姓不與焉是重吾不

德其令祠官致敬毋有所祈

後漢

後漢定齋戒之儀大祀及小祀各從其等 按後漢書禮儀志凡齋天地七日宗廟山川五日小祠三日齋日內有汙染解齋副倅行禮先齋一日有污穢災變齋祀如儀大喪唯郊天越紼而齋地以下皆百日後乃齋如故事 按百官志太尉公一人凡郊祀之事掌亞獻司徒公一人凡郊祀之事掌省牲視濯司空公一人凡郊祀之事掌掃除樂器太常卿一人掌禮儀祭祀每祭祀先奏其禮儀及行事常贊天子丞一人掌凡行禮及祭祀小事總署曹事太史令一人凡國祭祀掌奏良日及時節禁忌大祝令一人凡國祭祀掌讀祝及迎送神丞一人掌祝小神事太宰令一人凡國祭祀掌陳饌具太子樂令一人凡國祭祀掌請奏樂光祿勳卿一人郊祀之事掌三獻大鴻臚卿一人掌郊廟行禮贊導廩犧令掌祭祀犧牲雁鶩之屬祠祀令一人典中諸小祠祀侍御史十五人凡郊廟之祠二人監威儀有違失則劾奏

章帝元和二年詔增修羣祀 按後漢書章帝本紀元和二年二月詔曰今山川鬼神應典禮者尙

未咸秩其議增修羣祀以祈豐年 按祭祀志注東觀書詔曰經稱秩元祀咸秩無文祭法功施於民則祀之以死勤事則祀之以勞定國則祀之能禦大災則祀之以日月星辰民所瞻仰也山林川谷丘陵民所取財用也非此族也不在祀典傳曰聖王先成民而後致力於神又曰山川之神則水旱厲疫之災於是乎禳之日月星辰之神則雪霜風雨之不時於是乎禳之孝文十二年令曰比年五穀不登欲有以增諸神之祀王制曰山川神祇有不舉者爲不敬今恐山川百神應典祀者尙未盡秩其議增修羣祀宜享祀者以祈豐年以致嘉福以蕃兆民詩不云乎懷柔百神及河喬嶽有年報功不私幸望豈嫌同辭其義一焉

殤帝延平元年四月庚申詔罷祀官不在祀典者 按後漢書殤帝本紀云云

魏

文帝黃初五年詔禁淫祠 按魏志文帝本紀黃初五年冬十二月詔曰先王制禮所以昭孝事祖大則郊社其次宗廟三辰五行名山大川非此族也不在祀典叔世衰亂崇信巫史至乃宮殿之內戶牖之間無不沃醑甚矣其惑也自今其敢設非祀之祭巫祝之言皆以執左道論著於令典

晉

武帝泰始元年詔禁淫祠 按晉書武帝本紀不載 按禮志泰始元年十二月詔曰昔聖帝明王修五嶽四瀆名山川澤各有定制所以報陰陽之功故也然以道莅天下者其鬼不神其神不傷人故祝史薦而無媿詞是以其人敬慎幽冥而淫祠不作末代信道不篤僭禮瀆神縱欲祈請曾不敬而違之徒偷以求幸祿妄相煽惑正爲邪故魏朝疾之其按舊禮具爲之制使功著於人者必有其報而祿淫之鬼不亂其間

泰始二年令除禳祝之不在祀典者 按晉書武帝本紀泰始二年春正月景戌遣兼侍中侯史光等持節四方循省風俗除禳祝之不在祀典者 按禮志泰始二年正月有司奏春分祠厲殃及禳祠詔曰不在祀典除之

明帝太寧三年詔修祀典 按晉書明帝本紀太寧三年秋七月辛未詔曰郊祀天地帝王之重事自中興以來惟南郊未曾北郊四時五郊之禮都不復設五嶽四瀆名山大川載在祀典應望秩者悉廢而未舉主者其依舊詳處

宋

武帝永初二年詔禁淫祠 按宋書武帝本紀永初二年夏四月己卯朔詔曰淫祠惑民費財前典所絕可並下在所除諸房廟其先賢及以勳德立祠者不在此例 按禮志武帝永初二年普禁淫祠由是蔣子文祠以下普皆毀絕

南齊

武帝永明二年詔諸祀咸用袞冕 按南齊書武帝本紀不載 按禮志永明二年尙書令王儉議袞冕之服諸祠咸用詔可

梁

武帝天監六年詔祝史請禱不得爲朕祈福 按梁書武帝本紀天監六年正月己卯詔曰夫有天下者義非爲己凶荒疾癘兵革水火有一於此責歸元首今祝史請禱繼諸不善以朕身當之永使災害不及萬姓俾竝下民稍蒙寧息不得爲朕祈福以增其過特班遠邇咸令遵奉

天監九年詔祭祀盥洗各用一匱 按梁書武帝本紀不載 按冊府元龜天監九年詔曰祭祀用

洗匱中水盥仍又滌爵爵以禮神宜窮精潔而一器之內親用洗手外可詳議於是御臣及三公應
盥及洗爵各用一匱

大同二年改南郊明堂陵廟等令班秩 按梁書武帝本紀大同二年六月丁亥詔曰南郊明堂陵
廟等令與朝請同班於事爲輕可改視散騎侍郎

北魏

太武帝太延元年詔令禮報百神 按魏書世祖本紀太延元年六月甲午詔曰比者以來禎瑞仍
臻所在甘露流液降於殿內嘉瓜合蒂生於中山野木連理殖於魏郡在先后載誕之鄉白燕集於
盛樂舊都元鳥隨之蓋有千數嘉禾頻歲合秀於恆農白雉白兔並見於渤海白雉三隻又集於平
陽太祖之廟天降嘉貺將何德以酬之其令天下大酺五日禮報百神守宰祭界內名山大川上答
天意以求福祿

文成帝和平二年詔祭百神始復羣祠 按魏書高宗本紀不載 按禮志和平二年四月旱下詔
州郡於其界內神無大小悉灑掃薦以酒脯年登之後各隨本秩祭以牲牢至是羣祀先廢者皆復

之

孝文帝延興二年詔非郊廟社稷祀以酒脯 按魏書高祖本紀不載 按禮志延興二年有司奏天地五郊社稷已下及諸神合一千七十五所歲用牲七萬五千五百顯祖深愍生命乃詔曰朕承天事神以育羣品而咸秩處廣用牲甚衆夫神聰明正直享德與信何必在牲易曰東鄰殺牛不如西鄰之禴祭實受其福苟誠感有著雖行滌菜羹可以致大嘏何必多殺然後獲祉福哉其命有司非郊天地宗廟社稷之祀皆無用牲於是羣祀悉用酒脯

太和十五年詔減省羣祀 按魏書高祖本紀太和十五年八月議省雜祀 按禮志太和十五年秋八月戊午詔曰國家自先朝以來饗祀諸神凡有一千二百餘處今欲減省羣祀務從簡約昔漢高之初所祀衆神及寢廟不少今日至於元成之際匡衡執論乃得減省後至光武之世禮儀始備饗祀有序凡祭不欲數數則瀆瀆則不敬神聰明正直不待煩祀也

孝明帝神龜二年冬十二月庚申詔除淫祀焚諸雜神 按魏書肅宗本紀云云

北齊

文宣帝天保八年詔減諸祀物品 按北齊書文宣帝本紀天保八年秋八月庚辰詔丘郊禘祫時祀皆仰市取少牢不得剖割有司監視必令豐備農社先蠶酒肉而已雩祿風雨司民司祿靈星雜祀果餅酒脯唯當務盡誠敬義同如在

北周

武帝建德三年禁諸淫祀 按周書武帝本紀建德三年五月丙子初斷佛道二教經像悉毀罷沙門道士並令還民并禁諸淫祀禮典所不載者盡除之

隋

高祖開皇十七年罷齊祭日在路奏樂 按隋書高祖本紀開皇十七年九月庚寅上謂侍臣曰禮主於敬皆當盡心黍稷非馨貴在祇肅廟庭設樂本以迎神齊祭之日觸目多感當此之際何可爲心在路奏樂禮未爲允羣公卿士宜更詳之

開皇二十年詔禁毀壞偷盜祠廟神像 按隋書高祖本紀開皇二十年十二月辛巳詔曰佛法深妙道教虛融咸降大慈濟度羣品凡在含識皆蒙覆護所以雕鑄靈相圖寫真形率土瞻仰用伸誠

敬其五嶽四鎮節宣雲雨江河淮海浸潤區域並生養萬物利益兆人故建廟立祀以時恭敬敢有毀壞偷盜佛及天尊像嶽鎮海濱神形者以不道論沙門壞佛像道士壞天尊者以惡逆論

唐一

唐制祭祀之禮太常寺專主祠事 按唐書禮樂志五禮一曰吉禮大祀天地宗廟五帝及追尊之帝后中祀社稷日月星辰岳鎮海濱帝社先蠶七祀文宣武成王及古帝王贈太子小祀司中司命司人司祿風伯雨師靈星山林川澤司寒馬祖先牧馬社馬步州縣之社稷釋奠而天子親祠者二十有四三歲一禋五歲一禘當其歲則舉其餘二十有二歲之間不能徧舉則有司攝事其非常祀者有時而行之而皇后皇太子歲行事者各一其餘皆有司行事凡歲之常祀二十有二冬至正月上辛祈穀孟夏雩祀昊天上帝於圓丘季秋大享於明堂臘蜡百神於南郊春分朝日於東郊秋分夕月於西郊夏至祭地祇於方丘孟冬祭神州地祇於北郊仲春仲秋上戊祭於太社立春立夏季夏之土王立秋立冬祀五帝於四郊孟春孟夏孟秋孟冬臘享於太廟孟春吉亥享先農遂以耕籍凡祭祀之節有六一曰卜二曰齋戒三曰陳設四曰省牲器五曰奠玉帛宗廟之晨禋六曰進

熟饋食一曰卜日凡大祀中祀無常日者卜小祀則筮皆於太廟卜日前祀四十有五卜於廟南門之外布卜席闕西闕外太常卿立門東太卜正占者立門西卜正奠龜於席西首灼龜之具在龜北乃執龜立席東北向太卜令進受龜詣卿士高卿受視已令受龜少退俟命卿曰皇帝以某日祇祀於某令曰諾遂還席西向坐命龜曰假爾太龜有常興授卜正龜卜正負東扉坐作龜興令進受龜示卿卿受反之令復位東向占之不釋龜進告於卿曰某日從乃以龜還卜正凡卜日必舉初旬不吉卽由中及下如初儀若筮日則卜正啟轡出策兼執之受命還席以轡擊策述命曰假爾太筮有常乃釋轡坐策執卦以示如卜儀小祀筮日則太卜令蒞之日吉乃用遇廢務皆勿避二曰齋戒其別有三曰散齋曰致齋曰清齋大祀散齋四日致齋三日中祀散齋三日致齋二日小祀散齋二日致齋一日大祀前期七日太尉誓百官於尚書省曰某日祀某神祇於某所各揚其職不供其事國有常刑於是乃齋皇帝散齋於別殿致齋其二日於太極殿一日於行宮前致齋一日尚舍奉御設御幄於太極殿西序及室內皆東向尚舍直長張帷於前楹下致齋之日質明諸衛勒所部屯門列仗晝漏上水一刻侍中版奏請中嚴諸衛之屬各督其隊入陳於殿庭通事舍人引文武五品以

上袴褶陪位諸侍衛之官服其器服諸侍臣齋者結佩詣閣奉迎二刻侍中版奏外辦三刻皇帝服
袞冕結佩乘輿出自西房曲直華蓋警蹕侍衛卽御座東向侍臣夾侍一刻頃侍中前跪奏稱侍中
臣某言請就齋室皇帝降座入室文武侍臣還本司陪位者以次出凡豫祀之官散齋理事如舊惟
不弔喪問疾不作樂不判署刑殺文書不行刑罰不預穢惡致齋惟行祀事其祀官已齋而闕者攝
其餘清齋一日三日陳設其別有五有侍事之次有卽事之位有門外之位有牲器之位有席神之
位前祀三日尙舍直長施大次於外壝東門之內道北南向衛尉設文武侍臣之次於其前左右相
向設祀官次於東壝之外道南從祀文官九品於其東東方南方朝集使又於其東蕃客又於其東
重行異位北向西上介公鄴公於西壝之外道南武官九品於其西西方北方朝集使又於其西蕃
客又於其西東上設陳饌幔於內壝東西門之外道北南向北門之外道東西向明日奉禮郎設御
位於壇之東南西向望燎位當柴壇之北南向祀官公卿位於內壝東門之內道南分獻之官於公
卿之南執事者又於其後異位重行西向北上御史位於壇下一在東南西向一在西南東向奉禮
郎位於樂縣東北贊者在南差退皆西向又設奉禮郎贊者位於燎壇東北西向皆北上協律郎位

於壇上南陛之西東向太樂令位於北縣之間當壇北向從祀文官九品位於執事之南東方南方朝集使又於其南蕃客又於其南西向北上介公鄴公位於中道西門之內道南武官九品又於其南西方北方朝集使又於其南蕃客又於其南東向北上所以卽而行事也又設祀官及從祀羣官位於東西道門之外如設次所以省牲及祀之日將入而序立也設牲腍於東道之外當門西向蒼牲一居前又蒼牲一又青牲一在北少退南上次赤牲一次黃牲一白牲一元牲一又赤牲一白牲一在南少退北上廩犧令位於牲西南祝史陪其後皆北向諸太祝位於牲東各當牲後祝史陪其後西向太常卿位於牲前少北御史位於其西皆南向又設酒尊之位上帝太尊著尊犧尊山罍各二在壇上東南隅北向象尊壺尊山罍各二在壇下南陛之東北向俱西上配帝著尊犧尊象尊山罍各二在壇上於上帝酒尊之東北向西上五帝日月各太尊二在第一等內官每陛間各象尊二在第二等中官每陛間各壺尊二在第二等外官每道間各槩尊二於下壇下衆星每道間各散尊二於內道之外凡尊設於神座之左而右向設御洗於午陛東南亞獻終獻同洗於卯陛之南皆北向盥水在洗東篚在洗西南肆分獻盥洗篚罍各於其方陛道之左內向執尊罍篚罍者各立於其

後玉幣之饗於壇上下尊坫之所前祀一日晡後大史令郊社令各常服帥其屬升設昊天上帝神座於壇上北方南向席以稿秸高祖神堯皇帝神座於東方西向席以莞五方帝日月於壇第一等青帝於東陞之北赤帝於南陞之東黃帝於南陞之西白帝於西陞之南黑帝於北陞之西大明於東陞之南夜明於西陞之北席皆以稿秸五星十二辰河漢及內官五十有五於第二等十有二陞之間各依其方席皆內向其內官有北辰座於東陞之北曜魄寶於北陞之西北斗於南陞之東天一太一皆在北斗之東五帝內座於曜魄寶之東皆差在前二十八宿及中官一百五十有九於第三等其二十八宿及帝座七公日星帝席大角攝提太微太子明堂軒轅三台五車諸王月星織女建星天紀等一十有七皆差在前外官一百有五於內壇之內衆星三百六十於內壇之外各依次十有二道之間席皆以莞若在宗廟則前享三日尙舍直長施大次於廟東門之外道北南向守宮設文武侍臣次於其後文左武右俱南向設諸享官九廟子孫於齋坊內道東近南西北上上官九品又於其南東方南方蕃客又於其南西北上介公鄺公於廟西門之外近南武官九品於其南西方北方蕃客又於其南東向北上前享一日奉禮郎設御位於廟東南南向設享官公卿位

於東門之內道南執事者位於其後西向北上御史位於廟堂之下一在東南西向一在西南東向
令史各陪其後奉禮郎位於樂縣東北贊者二人在南差退俱西向協律郎位於廟堂上前楹之間
近西東向太樂令位於北縣之間北向設從享之官位九廟子孫於享官公卿之南昭穆異位文官
九品以上又於其南東方南方蕃客又於其南西向北上介公鄴公位於西門之內道南武官九品
於其南少西西方北方蕃客又於其南東向北上設牲牷於東門外如郊之位設尊彝之位於廟堂
之上下每座舉彝一黃彝一犧尊象尊著尊山罍各二在堂上皆於神座之左獻祖太祖高祖高宗
尊彝在前楹間北向懿祖代祖太宗中宗睿宗尊彝在戶外南向各有坫焉其靈尊二太尊二山罍
四皆在堂下階間北向西上簋鉶籩豆在堂上俱東側階之北每座四簋居前四簋次之六登次之
六鉶次之籩豆爲後皆以南爲上屈陳而下御洗在東階東南亞獻又於東南俱北向罍水在洗東
饌在洗西南肆享日未明五刻太廟令服其服布昭穆之座於戶外自西序以東獻祖太祖高祖高
宗皆北廂南向懿祖代祖太宗中宗睿宗南廂北向每座黼屨莞席紛純藻席畫純次席黼純左右
几四曰省牲器省牲之日午後十刻去壇二百步所禁行人晡後二刻郊社令丞帥府史三人及齋

郎以尊坫疊洗篚幕入設於位三刻謁者贊引各引祀官公卿及牲皆就位謁者引司空贊引引御史入詣壇東陞升行掃除於上降行樂縣於下初司空將升謁者引太常卿贊引引御史入詣壇東陞升視滌濯降就省牲位南向立廩犧令少前曰請省牲太常卿省牲廩犧令北面舉手曰臚諸太祝各循牲一匝西向舉手曰充諸太祝與廩犧令以次牽牲詣廚授太官謁者引光祿卿詣廚省鼎鑊申視濯漑祀官御史省饌具乃還齋所祀日未明十五刻太官令帥宰人以鸞刀割牲祝史以豆取毛血各置於饌所遂烹牲其於廟亦如之五曰奠玉帛祀日未明三刻郊社令良醢令各帥其屬入實尊鬯太祝以玉幣置於篚太官令帥進饌者實諸簋豆簋簠於饌幔未明二刻奉禮郎帥贊者先入就位贊者引御史博士諸太祝及令史祝史與執事者入自東門壇南北向西上奉禮郎曰再拜贊者承傳御史以下皆再拜執尊鬯篚幕者各就位贊者引御史諸太祝升壇東陞御史一人太祝二人行掃除於上及第一等御史一人太祝七人行掃除於下未明一刻謁者贊引各引羣臣就門外位太樂令帥工人二舞以次入文舞陳於縣內武舞立於縣南謁者引司空入奉禮郎曰再拜司空再拜升自東陞行掃除於上降行樂縣於下謁者贊引各引羣臣入就位初未明三刻諸衛列

大駕仗衛侍中版奏請中嚴乘黃令進玉輅於行宮南門外南向未明一刻侍中版奏外辦皇帝服
袞冕乘輿以出皇帝升輅如初黃門侍郎奏請進發至大次門外南向侍中請降輅皇帝降輅乘輿
之次半刻頃太常博士引太常卿立於大次外當門北向侍中版奏外辦贊明皇帝服大裘而冕博
士引太常卿太常卿引皇帝至中壇門外殿中監進大珪尚衣奉御又以鎮珪授殿中監以進皇帝
摺大珪執鎮珪禮部尚書與近侍者從皇帝至版位西向立太常卿前奏請再拜皇帝再拜奉禮郎
曰衆官再拜在位者皆再拜太常卿前曰有司謹具請行事協律郎跪俛伏舉麾樂舞六成偃麾戛
敔樂止太常卿前奏請再拜皇帝再拜奉禮郎曰衆官再拜在位者皆再拜諸太祝跪取玉幣於篚
各立於尊所皇帝升壇自南陛北向立太祝以玉幣授侍中東向以進皇帝摺鎮珪受之跪奠於昊
天上帝俛伏興少退再拜立於西方東向太祝以幣授侍中以進皇帝受幣跪奠於高祖神堯皇帝
俛伏興拜降自南陛復於位皇帝將奠配帝之幣謁者七人分引獻官奉玉幣俱進跪奠於諸神之
位祝史齋郎助奠初衆官再拜祝史各奉毛血之豆入各由其陛升諸太祝迎取於壇上奠之退立
於尊所若宗廟曰晨禋享日未明四刻太廟令良醢令各帥其屬入實尊饔太官令帥進饌者實諸